

Ka igkaruwa no sulat ni Huan no impaalap din dio to songo boi no nigtuu ki Hisu Kristu. Kagi ni Huan to:

1 ¹ Ka soini no sulat, nigligkat kanak no songo pogbuyagon to mgo otow no nigtuu ki Hisu Kristu. No igpaalap ku koykow no boi no indakoli to goinawa to Magboboot, woy igpaalap ku rod to mgo anak nu.^a Dakol ka goinawa ku kaniu su ligkat to pogtuu ta to tu-tuu ian no nangnangonon. Di kono no sikanak do ka duon goinawa kaniu, su agad hontow no niggongon on to soini no tu-tuu ian no nangnangonon, songo indakoli sikaniu to goinawa ran. ² Ka dakol no goinawa noy kaniu, ogligkat to tu-tuu no nangnangonon no nakatagu to goinawa ta. No agad songo monu kalugoy, kono man ogkaawo to goinawa ta.

³ Ogbuyu a to Magboboot no Amoy ta woy ki Hisu Kristu no ian Anak din oyow ogbuligan ki woy ogkohoy-uan ki woy ogbogayan ki to maawang no goinawa no ogligkat to oggongonan ta ka tu-tuu ian no nangnangonon, woy ogligkat dod to dakol no goinawa ran kanta.

Ko tu-tuu ian ka ig-anad, igdakoli ta ka mgo duma ta

⁴ Dakol ka igkarago ku su nakakita a to mgo anak nu no ogpaagad-agad to soini no tu-tuu ian no nangnangonon. No naayun sikan to insugu to Magboboot kanta.

⁵ No kuntoon inayon,^b ogparoromdomon ku sikaniu to og-awoson ta to oglayun ta igdakoli ka duma ta. Di ka soini no sugu ku kaniu, kono man no iam no sugu su sikan dod ian ka ingkasugu kanta nokani no an-anayan ki nigtuu. ⁶ Ko dakol ka goinawa ta to Magboboot, ogpaagad-akaran ta ka mgo sugu din kanta. No ka soini no insugu din, ian ka tahan no nigdinog now no an-anayan kow nigtuu ki Hisus, to og-awoson ta to igdakoli ta ka mgo duma ta.

⁷ Ian ku ignangon ka soini su mohon-ing ka ogpan-anad no oghiipanow kai to ampow to soini no tano. No ogpan-anad sikandan to si Hisu Kristu, kono no Lagboy no Igbuyag ta no nigligkat to langit no noimu on no otow. Ogpanggawoy sikandan woy og-usigon dan si Kristu. ⁸ Ayad-ayad kow oyow kono ogkaraat ka maroyow no

^a1 Waro ki lagboy mataga ko ian ogkasulatan ka songo boi woy ka mgo anak din, woy ko duon mgo otow dio to songo lunsud no ogmanimba no ian ogkasulatan. Ian su duon batasan dongan to mgo Griego no ogpoilingan dan no boi ka songo lunsud woy ko simbaanan. Ko sikan ian, ian anak din ka ogmanimba.

^b5 Dio to Ginirigu, ian insabi ki boi.

nohimu kaniu no nigligkat to pog-anad noy. Ian su oyow uromo, ogkoutol now rod ka tibo no igbogoy poron to Magboboot no igsayo din poron kaniu.

⁹Agad hontow no og-ongkod to soini no in-anad tongod ki Kristu no ogbalbalawon din on oyow konad on no tu-tuu, waro dio to kandin ka Magboboot. Di ka otow no ogparagason to pogtuu rin to sikan no in-anad, nakagongon to Magboboot no Amoy woy ki Hisu Kristu no ian Anak din. ¹⁰Ko duon otow no ogdatong dio to kaniu di ka ig-anad din loin to soini no tu-tuu ian no nangnangonon, kono now palopawa to baloy now. Woy songo kono kow ogpangumusta kandin. ¹¹Ian su ka otow no ogpangumusta kandin, ogpakabulig kandin to sikan no maroot no hinimuan din.

Ka intuguntugun ni Huan

¹²Dakol pad poron ka ignangonnangon ku kaniu, di kono ku porom ogmalayaton ogsulat. Ian su og-iman-iman a to ogpakapanumbaloy a dio to kaniu. No ko sikan ian, ogpakakita a to langlanguan now no ogkaayun ki no ogmaal-alukuyoy oyow ogdakol on ian ka igkarago ta.

¹³Ka mgo anak to hari nu kai no indakoli to goinawa to Magboboot, ogpangumusta koykow.